

平

播

全

書

平播全書卷一

畿

明長垣李化

奏議

報到任疏

欽差總督川湖貴州軍務兼理糧餉巡撫四川地方兵部
右侍郎兼都察院右僉都御史臣李化龍謹奏爲到任事
臣原任兵部右侍郎兼都察院右僉都御史巡撫遼東奉
旨籍養病萬曆二十七年三月二十八日准吏部咨爲
欽奉聖旨事四川巡撫員缺比照兩廣事例改銜總督四
川湖廣貴州三省軍務兼理糧餉該本部等衙門會推疏

名類請奉聖旨李化龍著以原官起改總督川湖貴州軍
務兼理糧餉巡撫四川地方寫敕與他欽此備咨到臣臣
望闕焚香叩頭謝恩訖續准吏部咨該臣奏爲久病庸臣
驟膺新命懇乞天恩俯容辭免以安分義以重地方事奉
聖旨西方有事特設督撫李化龍著兼程前去到任管事
不淮辭該部知道欽此又准兵部咨爲狡酋殘暴無忌等
事奉聖旨楊應龍輒敢糾苗殺官好生悖逆可惡著卽催
督撫李化龍郭子章及劉綎著遵旨一件星馳到任調兵
進剿不許延緩滋亂餘俱依擬行欽此又准兵部咨爲播
苗大殺官兵飛報緊急軍情等事奉聖旨是這叛苗圍劫

事情著該撫按嚴勘具奏李化龍并郭子章爾部裏馬上
差人催他到任俱限於五月內接管行事欽此又准吏部
移送新頒敕書一道關防一顆到臣臣接領欽遵兼程於
本年五月二十八日入四川境隨准前任巡撫右僉都御
史譚希思咨送原領符驗關防吏卷到臣接管行事除舊
關防一顆另疏奏繳外爲照臣化龍才術短淺品格下中
文不足以經邦武不足以定亂况當病廢已分沈淪過蒙
皇上收之泥塗之中授以節鉞之寄任兼督撫舉軍民夷
虜悉聽指揮地盡西南總巴蜀楚黔咸歸統馭寵榮若此
報稱謂何臣敢不勉效忠貞力圖建豎民力竭矣必嘯枯

起仆拯萬姓之瘡痍國體在焉須勵氣宣威息三藩之氛
禮奠封疆於萬里釋宵旰於九重此臣所以報皇上而酬
恩遇之職分也臣無任感戴激切屏營之至除應行事宜
陸續料理陳請外所有到任接管行事日期合行奏報爲
此具本專差承差張顯恩齋捧謹具奏聞奉聖旨該部知
道

請設中軍疏

題爲循例請設兵將以重事權以資戰守事臣本書生不習軍旅頃因西方有事皇上特設總督俾兼三省軍務過採廷推起臣於田間而任之控辭不獲且奉嚴旨臣惟人臣之義事不避難遂冒暑攜家兼程抵任已於五月二十八日入境交代受事六月初十日至省城延見吏民臣畿內人也去蜀遠在四五千里不知蜀事入其地乃知蜀蓋偷安弛備之國自開創以至於今非一日之積也其中沃野千里四面皆溪山土司環而居之蜀故無兵將止借土司爲兵將諸凡征討止調土司此輩有忠順者有桀驁者

甚至熟知內地虛實肆然驕蹇不奉漢法至與官兵相抗則今日播州是已夫居重馭輕王道之經尾大不掉立國所忌假令鎮城有主兵一二枝諸所征調不倚土司未必至是故鎮城之應設兵將自昔已然不獨今也今臣業已爲總督兼三省又當多事用兵之際兵將之設尤不容已查得各邊總督俱有中軍官主傳宣以副總兵爲之又有標兵二三枝備調遣應援以遊擊領之臣今事任相同相應照例設立中軍副總兵一員領兵遊擊二員聽兵部銓除標兵二枝各三千聽臣於本省及別省召募臣又查得各邊督撫俱有欽頒令旗令牌以便行事今勘中巡撫衙

門舊有符驗一道令旗十二杆令牌十二面但原係欽頒
巡撫收掌者臣衙門旣已改設旗牌亦宜另給以新耳目
以重責成臣又查得先年總督邢玠所領敕書內云如川
貴兵力不敷卽將湖廣土漢兵就近調取其浙江福建雲
南兵將俱聽調遣截殺及近日兵部覆請貴州總兵事任
亦奉旨雲南廣西一體應援擣剿今湖廣已爲臣屬應得
徑行調遣其浙江福建雲南廣西原未議及但浙福兵雄
天下雲廣壤地相比必須並得調遣乃便行事亦應照前
申明至於陝西一帶各邊俱係勁兵又去蜀最近雖禦虜
事重而防秋有時儻此中夷情重大兵力不敷亦容臣與

各邊督撫酌量衝緩就近借調一二枝則力逸功倍又與
彼地防守不大相妨亦應預行申明以便斟酌調取又山
東有召募南兵原爲防倭今苦於難散正在戍守若借以
防播尤爲兩便以上事宜通應題請伏乞敕下兵部查議
如果臣言可行乞賜覆請將臣標下銓除中軍副總兵一
員領兵遊擊二員俱以熟練勇敢知兵將官爲之浙江福
建雲南廣西將領及土漢官兵容臣酌量事勢緩急量行
調取文到之日所司卽行遣發山東及陝西一帶亦得借
調臣臨時定與各督撫計議相應必不敢虛彼實此其新
設官軍應給廩糧公費之類容臣查例行布政司支給各

兵應用餉銀容臣查川湖二省應動錢糧動支一面奏聞
不足之數另行陳請議處再乞內府製造符驗一道令旗
十杆令牌十面頒發臣收掌應用先年巡撫所收旗牌另
行奏繳再照軍興之際不時差人原有勘合火牌見在不
多亦行該部再給大勘合四十道小勘合六十道火牌八
十張通前用完再請統乞敕下該部覆請行臣遵照施行
緣係循例請設兵將以重事權以資戰守事理未敢擅便
爲此具本專差承差陳治道齎捧謹題請旨奉聖旨兵部
知道本部覆奉聖旨該鎮督撫新設事權宜重這偏選標
兵推補將官調用各省兵馬議處錢糧等項都依擬行軍

旅重大必須事事從實不許徇情顧面因循虛假各鎮亦
宜用心助力毋得坐視陳用賓沐睿等都馬上行文與他
每知道山東防倭等兵著精練好的差忠勇將官領去還
立限與他

報播酋屯兵疏

題爲土酋糾領苗兵劫掠內地事萬曆二十七年六月初十日據兵巡上川東道副使莫睿呈爲急報夷情事六月初八日據重慶府呈據綦江縣申稱卑職赴夔廠交木行至涪州於五月二十四日隄房遊擊手本據播州逃出綦民趙明口報楊應龍整點戈甲分付苗兵收拾飯米草把聲言要打綦南等處又據松坎民張榆亦報同前事煩請同縣計議等情於三十日同縣本日據驛丞杜連雲申稱播目張漢清已於二十八日劄兵松坎令各地方速備乾糧蠟布候本司刻下調用又據松坎民張倫報稱關外發

出苗兵十餘萬四下潛伏要乘內兵未齊之時拚命來戰
六月初一日又據驛丞杜連雲齋播文二角一申兵巡道
一申本縣拆看內稱苗兵之出無他意也止欲明我地界
取我叛奴等情申報到府又准房遊擊手本爲夷情事本
年五月三十日據安穩驛丞杜連雲報稱本月二十八日
播州坐寨張漢清提調郭俊領兵劄營地名苗兒坪稱言
前來尋取播州奸奴令狐培并逃出投民各軍在彼住劄
等語塘報間六月初一日又據偵探陳士立等報稱三元
壩劄兵二大營相離安穩五十里等情到營看得楊酋狡
詐百端陽爲尋取讎民陰懷搶掠地方其謀爲不軌者雖

未可量而效前取袁子升之故智必矣前後劄兵三營欲領兵前去拒堵約我兵二千餘名又碁江通播道路數處不惟寡不敵眾且慮顧此失彼卽日統兵四垵口舊營處所劄兵防範外所有應調官兵速發下營立候分布等因塘報到府轉報到道該本道一面差人齎牌諭酋禍福責令撤兵一面移文房遊擊首果入犯整兵拒堵彼若止劄營播地我兵不得輕進去後看得酋狡猾桀驁今此之來果謀先發制人未可知果止威力挾我未可知我兵在碁者不滿三千南川止於六百江津止於四百彼若全力攻我約苗兵可得二萬眾寡不敵旣已可慮酋之悖逆如此

已如火將燎原若非急行調集披髮纓冠而往尤恐後時今日之事真所謂時刻不容再緩等因六月十一日又據該道呈爲夷勢猖獗請兵應援事據重慶府呈據綦江縣申稱本月初三日據丁山里民高仕偉李漢壩民李萬璿安穩驛丞杜連雲報稱楊酋發兵萬餘一營劄安穩壩一營劄苗兒坪一營劄點腳壩地方居民罄盡逃散牛馬財貨恣意搶虜聲言不日攻打綦江等情到縣請乞速發新召萬縣精兵下縣以備應援等因又據該縣申稱本月初三日申時據偵探操兵向朝祿等同稱播酋統兵萬餘直攻趕水地方逢河卽卸民房搭篳渡過居民空境而逃等

情到縣看得趕水離縣五十里半日可到房遊擊欲出兵
堵截慮城無兵難以堅守暫劄營城下所有應援官兵懇
乞速發以救然眉等因據此除萬縣兵并府城兵共八百
名行張良賢領發外合行飛報等因到道查得綦江縣城
一日至趕水由趕水一日至安穩出安穩卽播州界此乃
往婁山關大路又自播州由小路不由安穩卽可抵趕水
本道向恐兵屯安穩播苗潛劄趕水扼我咽喉故議房遊
擊暫駐綦江縣今播兵敢於直入趕水此乃內地非播州
界矣此酋狂逞公然叛逆何辭自解乞賜調兵遣將前往
救援等因六月十二日又據該道呈爲飛報夷情事據重

慶府呈據南川縣申稱本月初三日三鼓時分據鄧坎村黨正李芳等走報本月初三日早楊應龍差婁國婁政等統苗數千餘馬兵百餘至鄧坎村安攘關劄住聞言欲打劫鄧坎井南川等情到縣看係楊酋乘虛爲亂劫虜地方木縣雖有官兵六百但眾寡不敵乞發兵將督勦以救然眉等因又據防禦南川指揮唐宗舜報稱相同行間又據綦江縣申爲夷苗劫掠官民事本月初四日據巡檢黎廣元申稱初三日辰時忽被苗兵數百人一湧到鎮驚散居民男婦牛馬財物任意般虜將本司衙舍盡行打毀等情又據驛丞李時明申稱附驛居民聞播兵劄營趕水觀音

寺橫行劫掠盡已逃避卑職家眷驚慌涕泣亦避對河杜
會家等情本日聞報後房遊擊親率兵至黃金坪地方各
苗亦退止趕水不敢前來卑縣看得逆酋自擬必死不憚
捐生且兵眾力強一時難摧其鋒而居民又畏酋如虎不
能立足事干地方大變等因到道看得播酋敢於狂逞既
親統大兵擾我綦江而又以偏師分犯南川劫掠居民牛
豬倉穀皆爲所有公然反叛難以再宥乞賜選將召兵前
來應援等因同日又據遊擊房嘉寵塘報內稱酋兵剽營
安穩等處楊應龍父子已出點腳壩分撥各兵攻打綦江
地名鹽井河安穩等處俱被燒劫牛馬穀石盡劫人口俱

逃又稱張樣等領兵已入趕水巡檢居民逃走卑職親督
丁兵前去魚涼河截殺外乞速發兵救援等情同日又據
敘馬瀘兵備道副使李廷謨呈爲地方事准建武遊擊楊
敏政手本據坐鎮五畝堡指揮王繼祖報稱六月初七日
卯時聞夷地銃響隨據偵探軍兵走報播夷萬餘出大魚
灣在斫木找筏渡水去堡未及半日等情又據該堡領兵
官龔萬祿報稱下赤水夷目袁年吐稱楊應龍果往茶江
差趙總營帶軍三四百將火牌說帖仰丁山赤水仁懷等
處取兵劊磨刀溪講說開路既不拆堡退兵楊應龍親帶
人馬打入合江儼死不免一遭今趙總營果到箐口等情

又據袁年中報前情相同及抄牌報道除行各官兵加謹
隄防外合行呈報等因十四日又據重慶府呈據南川縣
申稱婁國督苗數千到鄧坎村至初五日打劫居民有邊
勇鄉兵截殺斬獲苗頭一顆餘退五里劄營等情十七日
又據遊擊房嘉寵塘報本月初八日據偵探家丁報稱楊
酋發兵劄住地名母渡三溪十三營約兵八九千見在劫
掠鄉民卑職當同張良賢率兵前去堵截果見劄營是實
欲渡無船與之隔河對敵當時銃礮打死射中數多拒敵
至晚次日恐酋分兵侵縣內留家丁三十名軍兵二百名
設伏坐塘餘兵帶回入綦江計議刷船截殺隨據家丁百

總張喜等報稱瞭見播兵百餘由上流來圍我兵撞過對敵斬獲苗級三十名顆生擒五名其餘奔山入箐等因十八日又據重慶府呈據南川縣申稱播苗於初七日劫東鄉村被兵敵殺斬獲苗頭四顆等因同日又據遊擊楊敏政呈據永鎮堡百戶張承宗報稱楊應龍差陳提調前至箐口王繼先調兵一千又於儒溪調一千并起赤水等處欲攻五畝堡馬街子等情又據指揮王繼祖報稱播兵在地名龍門里劄有四營陸續添增其數難約鄉兵保甲聞酋勢大俱顧送父母妻子家家盡移十一日播兵在磨刀溪對山立營要講播界情由又據楊應龍差苗兵投遞手

書到職看得楊應龍統苗爲害假投手書計在緩兵奸宄
莫測等因同日又據重慶府呈據綦江縣申稱本月十二
日據新虜居民陳希忠張之俊趙可元等同稱楊酋帶兵
六萬親劄一大營在官壩其餘俱散劄在三溪母渡小河
堡等處日則縱苗搶劫夜則各收本營虜去人口老弱者
令其守營少壯者令其般運婦女任從姦淫不從者當時
殺死營內豎立大黃旗一面上書擒亡勦叛又小旗五面
招諭綦民有歸降者卽免勦殺等情到縣看得逆酋所爲
不止虎噬一方直欲鯨吞全蜀且綦邑乃首第一層門出
路把截不謹縱之出柙勢必難禦等情到府除行各土司

備兵聽調外事在然眉合行轉報等因十九日又據敘瀘兵備道副使李廷謨呈准遊擊楊敏政手本報稱十三日亥時據五畝堡指揮王繼祖把守官劉海等揭報本日午時官兵於界上與夷會講說稱要將各處官兵撤回又要楊遊擊回書如無回書要割合江穀食用等調兵齊打至合江少不得是這一遭又據哨報隊長奚老三稱本日卯時入袁年營哨看見上下夷兵劊八箇大營不知其數午時與播目陳世賢等至磨刀溪橋上會講他說五畝堡是我家放馬場毗盧寺是我家佛堂馬街子是我口口惟江北纔是你合江地方等語看得各有藉以索書撤兵拆堡

爲言漸次添兵恐意在內犯且各堡官兵又奉明文調發
松潘防虜各兵心愈搆貳等情到道除行堅壁清野慎加
防堵外合行通報等因同日又據合江縣申據指揮王繼
祖揭報前情相同及稱卑縣兵力單弱建武馬湖諸兵萬
總鎮又調建武兵往松潘彼心益搖乞速止之以保城池
等因二十一日又據兵巡上川東道副使莫容呈據南川
縣防禦指揮唐宗舜申准南川縣手本據快手徐淵報稱
婁國領兵千餘破劫東鄉村卑職於初八日領兵前去堵
截初九日彼先發苗兵百餘過河前來劫殺至午時各官
兵奮勇截殺斬級二十二顆彼苗復追各兵黑夜難敵將

首級盡棄止獲五功被苗虜去人口數十餘名等因又據房遊擊塘報六月初六日擒獲播苗袁志剛郭林審據吐稱楊應龍說如今朝廷不容我只得捨命出綦江拚著做當時他妻子勸留不住拏刀斫殺楊朝棟分兵二萬住貴州地方去了楊應龍於前月十七日點兵六萬分爲三路一路張漢清張樣陸罕郭俊領兵由松坎出苗兒坪安穩趕水一路婁國領兵由婁家里出眞州一路楊應龍親領兵出點腳壩楊燕塘丁山老馬寨約至插旗山會合連日天雨水隔楊應龍沿路行不得復回苗兒坪我每撞遇家兵擒拏其餘苗兵渡河奔走插旗山等楊應龍到齊先講

地方事後擄殺等情又據綦江縣申報六月初六日據扶歡堡鄉勇李仕孝等拏獲播苗王尙邦陳守兵到縣審據供稱楊應龍已親自統兵數萬在於苗兒岡劄七營趕水劄七營又於插旗山母渡等處劄營放言要即日統兵到縣與房遊擊講話是的本縣查得插旗山母渡止離縣二十五里卽時可到今酋猖狂捨命而來居民驚惶星散內兵力寡難敵危急在於斯須等因又據南川縣申報據指揮唐宗舜報稱楊應龍差苗兵數千馬兵二百餘前來東鄉村住劄聞言欲劫虜東鄉南川等情看得東鄉去縣不滿二十餘里今播酋猖獗意欲乘虛爲亂但兵不滿六百

勢處危急等因又據江津縣申報六月初七日據筭溪等里黨正陶榮等報稱探得楊酋來提頭目楊真母柱各處目把督苗數萬出劫綦江江津合江未知來否本縣城牆因水泛衝頽今暫立柵欄一面脩築今報夷情民心倉皇等因又據重慶府申報六月十五日據綦江縣申本月十三日據扶歡堡被害居民霍良用詹天辰等報稱楊酋見內兵出戰復加兵到營盡將民房拆卸脩立大營又發牌到州取兵四萬立意圍城見今殺死居民老幼男婦堆屍滿野流血成河江內日夜漂出男婦身屍不計其數情慘冤極等情到縣看得酋勢日猖酋兵日加殺戮無辜赤子

四野號哀莫能救援恐孤城兵寡餉盡一旦危急噬臍莫及等因到府查得綦江五里上三里鄰播俱被播苗劫殺木府城外大江漂流死屍日有百餘有無頭者有無手足者有大小三二人拴繫一處者無辜赤子遭兇酋毒手彼蒼豈縱之使然耶酋於三溪河外多劄空營又使苗呼房遊擊而罵之此多方以誘之之計也除移書房遊擊鎮靜固守外應調之兵應發之餉應遣之將宜及時施行等因到道該本道看得楊酋之初欲出兵也其妻田氏與幼子環侍泣諫不從甚欲拔刀斫殺此其兇心狂逞爲何如者今兵入內地號稱六萬雖係虛聲然二三萬乃其力所能

辦者大營劄於苗兒岡猶曰播地乃一營劄於趕水則入
綦江界一日已在百里之內矣又分偏師一犯南川一犯
江津吾方以文告緩彼而彼卽以申文誤我此其包藏禍
心眞爲叵測又查酋自五月二十七日已到苗兒岡今二
十餘日無所進攻者其意欲以遊騎零兵誘房遊擊深入
而取之一也又素聞我兵將善射敢戰彼恐一戰而敗各
苗瓦解故爲持重不發二也總之非愛我而不攻也然綦
江之危已如累卵矣必添兵二千劄於離城十餘里以爲
聲援犄角又南川必添兵一千劄於鄧坎村江津必添兵
一千劄於張市堡庶三縣可保無虞不然一縣失守川東

震驚此莫大之禍也又查酋之初至也不殺一人本道猶冀其悔禍今則縱苗兵於村落四出村民得逃者父母兄弟妻子離散矣不及逃者皆爲苗所俘獲從之者令其般運劫掠之物入播不從者殺之所得婦女恣苗奸汙從者驅之入播不從者亦殺之皆投諸溪流今屍流府城大江而下者相續哀哀赤子皆內地數十年休養而生聚者何罪何辜生者驅逐不異犬鷄死者斬艾如同草菅也又令苗兵般搶村民米穀布匹牛豬等物十室十空拒閉者縱火焚之自來酷暴未有如酋我兵雖有三千而酋兵十倍之戰則懼於覆沒守則坐於塗炭非大發援兵恐噬臍難

及等因各陸續呈報到臣爲照播酋楊應龍恃其地利之險兵力之彊玩侮中朝蓄志欲逞久矣年來假以擒拏叛奴一犯合江再犯碁江殺戮之慘節經奏報然猶未敢悉師以出也自覆沒黔兵之後益復長其雄心公然猖獗統兵內犯恣行殺戮尙且增兵未已莫睹其終而內地承平日久武備疏闕臣以五月二十七日入境首業以五月二十八日到邊比入省城警報旁午目前兵將無可調發會總兵萬鏊自松潘來見臣議秋防事臣乃遣令急走重慶一帶防禦又調發各土漢兵可二萬令分布防守第道里遙遠難以倏集縱令一呼而至烏合之眾僅足自守無言

戰矣重慶所屬縣分如綦江合江南川江津等處處通播處處無備卽近日議設防兵綦江止二千四百合江止一千二百乃綦江雖已報完合江猶然未募日來告急之使不絕於途臣多方徵調如塞漏舟東拆西補始足乘障蓋遐方絕徼法弛人玩所從來矣法無恃其不來恃吾有以待之內地所以待酋若此何怪其橫行無忌也至於劉綎身爲大將奉有嚴旨令與臣暨郭子章俱五月視事乃臣等俱如期至而綎且至今不知所在縱有請告一節得旨之後兼程遄發今亦當至彼日馳數百里黃柑遺撤離者獨何人哉綎久在行間其自處當不後於前人或未知

蜀急若此耳除臣一面申明軍令嚴督兵將相機戰守及於本處及近省召募徵調增兵防禦嗣有急息陸續再報外伏乞敕下兵部查議將臣前疏所請設兵將事急行議覆以便調度總兵劉綎馬上差人催促速到無令萬整獨當其難且誤防虜庶夷患不深地方事尚可圖矣緣係土酋糾領苗兵劫掠內地事理未敢擅便爲此具本專差承差徐嘉謙齎捧謹題請旨奉聖旨兵部便看了來說本部覆奉聖旨楊應龍罪惡多端朝廷念其先世恭順姑准贖死乃敢逆天背恩屢次狂逞今又公然領兵內地罪不容誅且彼處撫鎮文武等官何故任其竊發不早偵探原議

招兵何故至今未備欺蔽玩縱莫此爲甚該科便參看了
來你部裏卽馬上差人著李化龍嚴督所司慎加防禦准
便宜行事不許有誤機事一面速行料理兵食應付其劉
綰世受國恩又今敘功在邇特寄重任待之不薄何爲遷
延逗遛不爲朝廷盡力便馬上嚴催他去若有別情著他
早奏將來毋致誤事不便司道官凡係用兵處所的吏部
就近更調有才略諳機宜的去府縣官許該撫按於本省
內揀選調用

報播酋陷城疏

題爲急報播酋陷城殺將事萬曆二十七年六月二十六日據兵巡上川東道副使莫容呈稱本月二十二日卯時據綦江縣塘報本月二十日房遊擊張良賢與播兵城下一戰播兵死者有數十人家兵死者八人張良賢被圍七層幸殺出二十一日播兵劄營在城口內兵俱收在城上互相抵敵本日楊應龍傳令箭一枝要速發本頭何邦卿等六十餘名如一名不發立至滿城塗炭危在頃刻乞速救援等因二十七日又據總兵萬鏊報稱本職於本月二十一日到重慶二十二日寅時據塘報前情相同及稱本

日申時據防守兵阿位陳天富報稱二十一日天明時楊應龍督率苗兵數萬攻圍城池房遊擊被火藥燒傷苗兵隨卽上城張良賢胡守備馬知縣不知生死等情到職未委虛的查實另報等因同日又據兵巡上川東道副使莫睿呈據偵探軍兵李朝忠報稱六月二十日楊酋統兵八萬從三路逼近綦江縣城房遊擊并張良賢分兵一千守城以兵二千出敵頗有斬獲苗兵退去至二十一日辰時楊酋親統眾兵圍城數日房遊擊於城上親放火磚誤入火藥桶內燒死我兵數人苗兵乘機蜂屯蟻聚上城又於城內大戰房遊擊張良賢皆陣亡守備胡汝甯入水身死

千戶等官未知存亡各兵馬損傷逃出俟查明另報等因
通報到臣查本月二十四等日據副使莫睿呈准房遊擊
手本稱探得播兵萬餘屯劄二十四營聲言先打綦江後
到重慶各將會議於十七日令張良賢爲先鋒其餘官兵
本營隨爲犄角到舊東溪撞遇播兵一處對敵數陣斬獲
苗級一十二顆追赶落水死傷不計其數又稱十九日播
苗一湧到東溪街上將各民家小虜去四十餘人殺死八
人刀弩傷百餘人等因前來隨牌行該道及總兵叮囑各
將領軍兵今我防兵數少寡難敵眾惟宜堅壁固守以待
援兵毋輕率鮮謀爲敵所誘如被圍城緊急自當出奇制

勝務保萬全去後先經臣於六月十三等日檄調龍安參將柴尙仁雅黎遊擊吳文傑并遣差旗牌官標兵等役每日分投於通省敘州江安等有司鎮雄永甯等土府調集漢土軍兵馳赴重慶分布防援一面行布政司動銀分發州縣糴穀碾米運至重慶聽用又經備將東南各道并重慶綦江等府州縣各節報楊酋統兵入犯緣由已於本月二十六日具疏題報訖今據報到前因爲照酋自招撫以來氣日驕威日熾假以擒拏逃奴爲名鄰播一帶縣邑歲被其毒然向來止目把領兵以出耳未嘗親統多兵公然內犯也卽有搶虜亦止橫行郊野風雨飄忽一飽卽歸耳

未嘗攻城殺將居然若一敵國也乃今且入我嚴城殺我
驍將兇威虐焰不可嚮邇豈天有意稔其惡而然耶臣一
入省城卽聞警報徵調四出驛騎交錯所發援兵三萬有
奇乃道旣阻脩兵非素練徒爾熱中何能湊手且徵兵之
檄方行破城之報已至臣且奈之何哉今重慶日告急矣
瀘州南川江津一帶且震動矣臣已申嚴各城益脩守具
以待援兵顧全蜀兵力已自可見利鈍之數尙不可知卽
使借調他方投袂而起猶或可及一有遷延坐失機會臣
恐其爲報讎之師而非救急之役也裹瘡飲血析骸易子
臣不敢不爲諸臣勉之批亢擣虛張疑設伏臣不敢不與

諸臣圖之惟望皇上重念全蜀亟賜拯救救下兵部將臣前疏所請刻行調發庶裨戰守夫久病而蓄艾亡羊而補牢雖無補於前尙有待於後行之稍遲禍如發矢不可追已臣無任激切待命之至除俟兵餉稍集臣卽隨其向往相機防禦并委官前去查勘損傷官軍實數與印信倉庫獄囚另奏外緣係急報播酋陷城殺將事理未敢擅便爲此具本專差承差李朝恩齋捧謹題請旨奉聖旨兵部知道本部覆奉聖旨綦江失守蜀事甚急可憂著總督率屬勵兵相機防剿不得仍蹈前人玩縱輕率等弊合行事宜作速奏來陝西延綏甘肅浙江等兵俱准如數調發仍著

揀選精銳刻期赴援軍火器械給與隨營應用各鎮官宜
同心協濟不得有分彼此漢土諸兵到日仍著劉綎提督
伊素稱忠勇欲以功名表見你部裏馬上再行諭催著他
奮身報國延綏八衛兵還再議來餘俱依擬

條議貴州移帥增府佐募苗兵疏

題爲貴竹阡危敬陳安邊四策以佐緩急事萬曆二十七年六月內准兵部咨該巡按直隸監察御史蕭重望題前事內開一清尺籍一議督鎮一拓疆圉一督積逋本部覆議黔地彈丸之區實通滇咽喉之路乃今狂酋肆虐事勢阡危以故慮周桑梓策計安攘除事隸別部者聽其徑自議覆外所有事關本部者相應開列前件覆議上請定奪等因又准戶部咨同前事俱題奉欽依備咨前來除移文黔省撫臣及通行貴州布政司會同按察司查議去後續據二司通詳及撫臣移咨到臣該臣謹會同巡撫貴州兼

理湖北川東地方軍務都察院右副都御史郭子章巡按四川監察御史趙標巡按貴州監察御史朱興祖議照貴州古夜郎羅施之地夷漢雜居所宜因俗爲治難盡以文法束縛之者第事貴審時勢須通變當甯謐之會則法網自宜闊疏值勳之秋則綜理無嫌微密今御史以事關桑梓上言時宜誠綢繆牖戶至計所有列款募苗兵移大帥更裨將增府佐與責成清查積逋錢糧等件均屬目前急務既經該省二司詳議允當又該臣等覆查相同應合照款開列前件議擬具題伏乞敕下戶兵二部再加查議如果相應覆議上請行臣等轉行遵照施行緣係貴竹帖

危敬陳安邊四策以佐緩急事理未敢擅便爲此具本專
差承差葉承嗣齎捧謹題請旨

計開

一清尺籍募苗兵御史蕭重望議謂貴州各衛所額軍脆
怯欲汰去老弱勾補逃亡又應責成各長官司召募苗兵
等因本部覆議應行總督撫按著實清查揀壯勇汰老弱
務足原額以備緩急近日該省疏內紅兵苗兵臨敵潰損
殆盡今議召募而復及於勸能恤勞深得鼓舞之術亦應
併行督撫按官議處妥當應徑行者徑行應奏請者奏請
前件臣等看得清尺籍募苗兵一節今貴州貴前黃平等

二十衛所額軍雖少尙有十分之七但各軍士俱係洪武年間額充至今子孫相沿頂補不惟老弱者不堪從征卽少壯者亦止備數頃者飛練之役衛軍半覆可鑒已苗兵儘悍堪以禦敵但貴中司帑匱乏所不足者募金耳俟錢糧充足當亟行召募更加訓練自可卽戎伏乞聖裁

一議督鎮增將吏議謂以總督改駐貴州貴州巡撫撫蜀便貴州總兵駐銅仁清浪去銅仁甚近要移銅仁守備於清浪移清浪參將於銅仁總兵專駐偏橋適中及將普安守備改設參遊宿以重兵龍泉司爲思石要害乞增設思南府同知駐劄該司等因本部覆議總督之設先該科臣

爲黔楚蜀地里錯壤而播界三省黔爲彈丸之區糧餉悉仰川湖原議督臣平時駐劄四川上游以便節制有警移駐鄰近有事去處調度則黔蜀皆得隨便駐節及查總兵先年駐銅仁爲苗賊出沒今播患方殷不妨量移而清浪參將移駐銅仁其控制苗夷事權頗重苟非加銜曷隆體統至若普安接軫滇南改將增兵勢固難已龍泉爲思石要區宜設協守府佐但事體更張不厭詳慎應行總督撫按悉心會議妥當具奏以憑覆請定奪

前件臣等看得總督設於四川原係居重馭輕部覆已明無容再議總兵始以防苗設於銅仁今銅仁地方稍稱輯

甯偏橋鄰播爲患方殷委應將銅仁總兵移鎮偏橋以重
彈壓清浪參將移駐銅仁銅仁守備移於清浪一轉移間
事體俱便普安守備設於安莊衛接壤滇中夷苗錯雜委
應改設參將一員第今防播爲急應將銅仁參將暫移興
隆普安參將暫移新添通候事定之日仍同原鎮見任普
安守備趙大用聽調別用思南府佐原少委應增設府同
知一員駐劄龍泉與思石守備協守卽以附近知州資俸
相應者陞補查得土司吏目半不到任合無酌量裁革四
員少資俸薪不足行該府於餘稅銀內另議仍照四川建
武安邊同知事例頒降關防以便申達軍機夷情至於總

兵參將各官敕書通應更換開載信地責任行事伏乞聖
裁

一拓疆圉壯邊藩議謂黔省重鎮單弱可憂近日偏橋之
事可爲殷鑒議待播事平定割楚之偏橋鎮遠平溪清浪
又割蜀之永甯烏撒鎮雄以拓黔壤等因本部覆議裂土
分疆版圖久定不加會議猶恐楚蜀別有窒礙應通行三
省總督撫按衙門詳加商推要見所議割地之事如果安
便可行卽酌定改正不得私意執拗儻有未便亦明白聲
言具奏定奪

前件臣等查得黔省本蕞爾之區而平清偏鎮四衛又屬

於楚永播烏鎮土司又屬於蜀似應割屬黔中以便控制
但今地方多故一更改間彼此互相推諉恐致誤事俟甯
謐之日通行三省另議伏乞聖裁

一督積逋議謂貴州一省每歲川湖協濟錢糧在四川有
司全完而土司與湖省所屬節年未完數多等因本部覆
議恭候命下移咨四川湖廣各將每年協濟貴州糧銀務
要盡數催徵完解儻仍前後時逋負經承各官聽貴州撫
按叅治如經收人等乾沒侵隱領解員役在途遷延依律
究治立限比追

前件臣等查得貴州原額官軍募兵糧餉議於川湖糧銀

內支給共銀六萬八千有奇募兵錢糧按季支領合省二十衛所官軍應支糧餉尙有半年未給者有八九箇月未給者祇因湖廣長蘆郴等府州縣錢糧節年拖欠銀六萬二千三百七十六兩四錢九分有零四川土司在烏撒烏蒙東川等府共欠二萬四千六百餘兩在播酋楊應龍共欠二萬三千五百餘兩今應龍已無望矣其餘拖欠地方除臣等另文行催外卽使如數解足僅可補支官軍與舊募兵之糧餉今值地方多事新募勁兵必須增餉如蒙允念黔省物力難支乞照撫臣別疏所請閩廣等處准借庫銀三十萬兩接濟軍餉庶可支持伏乞聖裁奉聖旨該部

知道本部覆奉聖旨依擬行

請留陝銀取雲南銀充餉疏

題爲查復改解銀兩接濟軍餉事據四川布政使司呈奉
臣紙牌照得川省每年協濟陝西軍餉銀一十萬四百三
十五兩二錢先是前院會題松潘防虜調將口口經費不
貴議於前銀內自二十五年起每年留三萬兩在川防虜
止解七萬四百三十五兩二錢協濟陝中業經部覆奉旨
欽依遵行訖二十七年三月內戶部咨稱松潘防虜警已息
取解原留銀三萬照舊運陝行司議稱虜尙未退將兵未
撤原留銀兩仍應再留等因存卷今該本部院檢查看得
前銀留用專爲防虜虜旣未回將兵見在防守該司照舊

議留三萬兩自是相應第目今事勢又異往昔播苗內訌破城屠將東南一帶處處應防應募精兵不啻數萬所費餉銀亟應預處今該司庫貯既無幾何內帑又難輕議所有摘解陝銀七萬以本地之銀留本地之用自是事理之當然者又查雲南先年兵興節次借過餉銀四十萬兩原議事甯解還除先解十萬兩以作採木支用近又還十萬兩以作四川協濟貴餉仍有二十萬兩未經解回今川省多事比之先日滇南不啻數倍卽尋常尙應相借况久借豈應不還仰司會同按察司計議防播官兵糧餉與軍中應用製造火器衣甲買馬等項大約用銀若干該司庫貯

堪充軍餉銀兩有無足用儻若不足應於何項措處陝西
濟邊銀兩應否全留雲南原借未還餉銀應否取還逐一
議妥通詳以憑會題奉此該本司左布政使程正誼會同
按察司署印副使盧泮看得云云等因到臣卷查先隼戶
部咨前事內稱四川布政司每年協濟陝西四鎮軍餉銀
一十萬四百三十五兩二錢萬歷二十五年該四川撫按
題稱松潘召集官兵防虜經費不貲要將前銀內每年議
留三萬兩以充兵食於太倉每年照數補解陝西待事甯
照舊起解該本部看得川省虜今已甯前留銀兩須自二
十七年起仍解陝西接濟等因前來備行該司查議隨據

同稱松潘地方切鄰北虜近日住牧界外窺伺內地未嘗
一日忘情於松今年暮春羣虜出沒官兵擒斬一十五名
顥正控弦露刃之時則此防守之兵誰肯議撤一人原留
陝銀乞仍留用等因通詳前無臣移咨間茲以播事孔棘
牌行查議去後今據前因該臣會同巡按四川監察御史
趙標議照川省自有虜警以來歲用錢糧每多浮額去先
年無事之時已迥異矣加之採辦大木設防播酋通省庫
藏搜括一空東那西湊以應目前且時下播患正殷今自
六月報警之後日每調兵運餉羽書交馳以故防守漢土
官兵所支本折與買備糧糗製器買馬諸費更繁該司只

得於正項內借支應用蓋事端初起已若此矣查得甯夏
朝鮮用兵費內帑至五百萬今川省用兵不減二處祇因
內帑空乏尙未敢分毫議及若本地之銀又供他餉目前
經用憑何取給卽曰陝西額餉不容短少然今無事地方
尙可搜補卽如各處之兵移調川省則原設餉銀自可別
用通融接濟在一查覈之間耳蓋今日之他省卽昔日之
四川而今日之四川卽常日之陝西此理甚明據議協濟
陝省前銀委應暫留至於滇南原借蜀川銀兩除已還與
解貴州抵川協濟之數外尙有二十萬兩未還今滇南甯
靜別無他費卽不敢望分外借給亦自應償還原數不然

我有事則資之以圖功彼有事則置之於度外無論披髮纓冠之義卽鄰比報施之常亦甚不侔矣所有前項二事併應具題伏乞敕下戶部再加查議上請將四川每年協濟陝西四鎮銀一十萬四百三十五兩二錢暫留川省接濟軍餉待播事結局之日遞年照舊仍解陝西其雲南原借四川未還銀二十萬兩乞敕雲南撫按嚴立限期令該布政司如數差官解四川布政司收貯聽支庶時艱得以急濟而防播禦虜均有攸賴矣緣係查復改解銀兩接濟軍餉事理未敢擅便爲此具本專差承差陳堯化齎捧謹題請旨奉聖旨戶部知道本部覆奉聖旨

請罷開礦疏

題爲直陳地方艱危之狀以希特恩以消隱禍事臣受命
總督三省防勦播首祇畏簡書冒暑入蜀甫至則報首已
親統大兵侵犯蜀境臣方調兵遣將宵晝弗甯無何又報
首已攻下綦江漸逼重慶臣且十道徵兵寢食爲廢目今
兵漸集勢漸張首亦且劄兵境上莫測向往而我兵微將
寡烏合之眾僅足自守無能撲滅此積衰之勢非止一朝
臣不敢不勉竭庸駑力圖底定乃臣有所大憂者不在兵
糧不在叛逆而在內地之人心此如厝火積薪而寢處其
上不能一夕安者也夫巴蜀僻在一隅夷漢雜居易動難

安自昔記之矣治蜀者必須鎮以靜定綏以寬仁乃足以和民而懷遠固圉而安疆顧今寇在門庭急於焚溺勢不得不興師動眾又不得不勞民傷財小民固已難之矣然猶可曰此佚道之使生道之殺上爲不得已之役而下爲不得已之供獎以大義動以至情猶可使也乃至有不得已而不足以搖民而資敵如徵稅開礦之事及今不止隱禍且大臣亦何敢無言夫礦稅之事奉有成命差有監臣而臣與按臣且有調停之責有阻撓之戒以故臣一至地方卽與按臣會行該司查議定爲規條立爲則例期於如額以稱上指卽礦洞亦令隨便開採各有司止爲防守無

得阻撓臣爲陛下理財裕國以爲無遺憾矣乃節據各府縣申報多謂播酋內訌士民流散商賈不行坐派稅銀何從出辦重慶等處且謂城門已閉委官已同將來計數要稅何處賠補則臣於是乎技窮而無所之矣夫蜀做國也半爲山箐半爲土司其稱沃野可耕者僅千里止耳今東南一帶兵所至已爲荆棘兵所不至亦爲荒墟西北一帶方且招兵買馬運糧製器不從鬼輪皆須民力此何等景象何等時勢而尙堪爲額外之徵乎據言利者必以爲稅取於商不取於民不知兵戈擾攘之地顛沛流離之秋土著者已不安其家懋遷者肯輕入其地商不足則不得不

取盈於民以待盡之民供意外之取其不轉徙而爲寇者
幾何方欲招客兵而先自散其民方欲搆叛黨而且更借
之兵卽有孫吳何能爲計此臣所爲焦心勞思太息而不
禁者也至於蜀之礦山半在夷地卽在蜀者亦用力甚難
獲利甚少益不足爲有無者臣以爲當與權稅並罷便然
猶奉旨在先者也臣近日又接邸報見應天衛百戶范倉
一本爲恪遵祖制等事奉聖旨這所奏貴州地方稅課并
土產名馬有裨國用准差奏內內官監左監丞張慶督率
官兵前去彼處會同撫按等官照例徵收銀兩解進不許
擾害地方寫敕與他該衙門知道欽此臣一見之不覺驚

愕失措夫貴州何地此時何時而尙可爲此事乎蓋貴州原非省會止以通滇一線因開府立鎮強名曰省其實皆高山峻嶺軍民無幾尙不能當他省一大府有何名馬方物其誰不知之彼武弁貧窘無聊又見各省俱有稅使以爲貴州雖稱瘠薄然但得誑奏聖明奉旨徵稅傳食萬里逍遙數月計至彼處卽不如額且可充囊此不過爲身家之計已耳豈復有一毫爲國之心乎夫使其爲往日之貴州也止於無稅而已乃今自播首造逆一破偏橋枯骨遍野再戰飛練流血成淵至今驛路阻絕人煙稀少逆酋且狃狃思逞急於燒眉臣與撫臣郭子章每算及該省兵糧

計無所之移書嘆惋今且驅遺民守危地小民如坐漏舟
已有違心驟聞此舉將謂稅無從出必括於民轉相驚恐
勢必逃散遐方孤城誰爲填實他日必有士卒不戰城門
不守之勢而一方之事去矣陛下天縱聰明必不忍以一
方輿圖易數千稅課或亦未知地方情事謾然應之云耳
臣以爲貴州稅使宜急罷勿遣便臣爲三方總督湖廣亦
係臣屬亦有防播之事然其地去播稍遠中禍未深臣不
敢多爲不必然之說以聳動陛下惟是四川貴州去播甚
邇受禍甚慘民心最危時勢最急臣若隱默不言恐禍機
竊發不可收拾當是時而言之則晚矣臣謹會同巡按四

川監察御史趙標貴州撫臣郭子章按臣宋興祖直陳艱
危情狀乞恩陛下伏望將貴州中使暫免遣行四川中使
或令姑儘見收稅銀少辦方物暫取回京待播事甯靜之
日另議庶兩省士民雖在湯火尙免糜沸臣得以大義勉
之令爲國家效死禦寇或底定有期太平可望矣臣無任
激切仰望之至緣係直陳地方艱危之狀以希特恩以消
隱禍事理未敢擅便爲此具本專差承差陳堯化齎捧謹
題請旨

添設裨將疏

題爲播防肇畫正殷虜患隄備尤急乞賜復增副總添設裨將以重事權以安邊鎮事據四川布政使司呈奉臣紙牌照得松潘原有副總兵一員統設東南北三路自二十四年間因達虜突犯漳臘等處官兵斬馘去後狡虜時懷報復潛住東塞出沒無常兩院會題議改建武總兵駐劄松潘就近提調三路將領軍兵其副總裁去改擬遊擊駐守建武各有責任關係頗重頃接邸報兵部具題將總兵萬鏊陞任南京員缺卽以總兵劉綎填補已經奉命旨但劉綎旣奉命領兵防播勢必駐守重慶一帶松潘僻在一

隅恐不能遙制應與瀘合添設將兵事宜一併從長查議
爲此仰司會同按都二司計議松潘副總員缺應否暫復
待播事完日議處如當議復該衙門應用事理俱照舊額
議給其瀘合江津彭武一帶卽今事勢若此應否再添將
兵至於松潘總兵旣駐守重慶本官供需與部下員役在
松額支糧餉作何支解議妥通詳以憑會題等因奉此該
本司左布政使程正誼會同按都二司署印副使盧泮看
得云云等因到臣該臣謹會同巡按四川監察御史趙標
議照松潘設在西極當番虜錯雜之區向來止有番警原
無虜患止設一副總兵督兵防守自火落赤移往洮河之

外切近松邊時有出沒松邊遂爲戰場故以建武總兵移鎮彼中以重彈壓將副總報罷今播酋造逆狂逞野多暴骨守靡堅城則播防之重什百松潘不得不移總兵於重慶亦其勢也顧重慶距松潘東西相望幾二千里調度稟承皆所不及松邊各將漫無統紀豈成兵政則協守副總之設不容已矣重慶雖有總兵顧向來綦合二將落落晨星一當羣苗已成不守其邊播一帶州縣可數百里必須陳兵設將各守信地互爲應援則瀘涪等處參遊之設又不容已矣今據該司所議松潘仍設副總兵良是然必加以協守職銜令沿邊一帶將領皆聽指揮調度臨敵之日

得按軍法庶便行事仍遙受節制於總兵以全專閫之體
其重慶設領兵遊擊一員平時訓練軍士有事移駐南川
或隨總兵戰守隱然以身使臂之義亦爲策之得者乃若
瀘州涪州均與播境接壤查昨年逆酋以擒拏部民徑入
瀘之小市又以獻木爲由苗亦臨涪且二處鄰封如江津
如彭水俱高山峻嶺歧路甚多皆苗出沒襟喉應添參將
二員一駐瀘州則江津納谿五畝與永甯等界俱屬信地
一駐涪州則彭武長壽江口與酉陽等界俱屬信地有警
隨宜移駐又與合江南川遊擊各爲掎角居然有虎豹在
山之勢此皆目前建設必不容已者俱應如議至於各參

遊與所部軍兵悉由總兵指揮分布其總兵應有廩餼供
需一切操賞門下員役日用工食俱應仍照萬蓋原在建
武腹裏事例支給新添參遊各官俱照塌底合江參遊事
例應轉輸者改解之應增添者於布政司庫議給各官駐
守信地把截歧路應更應頒敕書與符驗等件并副總兵
關防俱聽部擬給與其副總并參遊等官俟播事終局另
議再照西蜀原無見兵今所調用防守者止土司與各州
縣旋行召募之兵耳土司兵止可暫用難以久羈召募兵
俱係烏合難以應卒夫有將而無兵與有兵而無將其無
濟於用等耳查今議設將官與原設碁合及臣標下兩營

總兵坐營一營共將官八員每員領兵三千該二萬四千先該臣原議調陝浙等處勁兵今陝西正值秋防似難借調而海東倭氛久息正可移來合無將各處南兵調用浙兵三千山東三千朝鮮撤回兵調兩營共六千付之南將統領臣再於川中募六千秦中募六千付之北將統領其將領除協守副總兵應於北將如魯光祖戴延春馬孔英內推用一員外其餘新設并綦合及臣原請標下兩營參遊等官應於南北將領相兼推用皆擇素有聲名久經戰陣者照缺推補勒限到任係南將者卽令押發南兵前來係北將者令多帶慣戰家丁前來通限十月內入川逗遛

延遲者叅治庶幾兵將皆屬可用攻守惟其所施夷氛可
息內地可安矣統乞敕下兵部覆議行臣等遵奉施行緣
係播防孽晝正殷虜患隄備尤急乞賜復增副總添設裨
將以重事權以安邊鎮事理未敢擅便爲此具本專差承
差陳堯化齋捧謹題請旨奉聖旨兵部知道本部覆奉聖
旨是

再報播酋情形疏

題爲再報逆酋情形並議處失策臣工以重國體以飭兵防事案查播酋楊應龍統苗攻破綦江殺戮將兵緣由臣於六月二十八日具題訖本月三十日據兵巡上川東道副使莫容呈稱二十一日據播州宣慰司批差任三齋文投稱准本司原任宣慰楊應龍稱飛練動激並未越境致蒙江軍門加參擅殺防禦官兵而房遊擊亦不肯容不得不尋對頭乞將潛府匿縣奸奴何邦卿等數十名差官交割并將次男身屍恩斷葬禮給領存沒霑恩若容護奸奴甯拚漢唐繼世之爵土甘捨歷代先今之功勞在處跟

拳逆黨盡皆生啖其肉不惟道府控訴徑至九重闕下甘於瞑目等因七月初二日又據副使莫睿呈據打探快手陳忠報稱二十一日辰時播兵齊圍城令一通事與房遊擊馬知縣同講話何故殺他商賈投文人役叫發還本頭等語未及頃刻兩來銃箭相衝不意牆倒火磚自發播兵擁奔上牆我兵俱敗投河各民家被殺房遊擊敗於南水門首級割去是實張良賢胡守備未否逃殺胡順堯孟百戶捉虜上營房家一妻二男張家一妻一男一使女發馬知縣取印領訖馬知縣衙內士民男婦止有三百多人幸令旗來傳叫不要殺馬知縣衙內人獄囚將門撞開其逃

死罪李朝選投上營已撥有兵管止未起孝一人自投馬
知縣二十二日令三日把領兵勒令馬知縣做文與楊宣
慰看改過方申報道府求安撫方差余林等齋報本日下午
晚又令二目把來查庫銀止一千八百零後勒令馬知縣
與各民寫一認結狀出銀二千兩犒賞軍兵二十三日白
牌一面差三日把招諭各民安插取一印信冊領又白牌
一面差一目把令馬知縣支米糧與軍兵又差三日把來
講話叫將奏民發還伊男屍還播添設兵將撤退等語二
十四日又差目把李旭等三人來取庫銀一千八百臺上
營去亦要馬知縣到播州作當叫各民與赴陳奏安撫後

各民苦講哭訴各願赴訴寫一認狀官吏士民畫押與去看方不要馬知縣去二十五日云認狀并文書不好將三日把鎖項又將文勒令改過去看另寫用印與去就將馬知縣男并舅子二人扛擡去訖叫馬知縣與訴安撫撤兵方去各日口稱要打南川重慶江津往回等語本日又發兵將倉穀米盡行燒燬兵各纜去民房南門橋至勝果寺羅宅二向北門至楊四廟盡燒虜去男婦男子擔鹽令人押十婦人往大路同播各兵馬往三溪入東鄉壩去打南川未否本日劄營在母渡河歇二十四日發四生員一吏五士民次日來喚去認家小又被各兵擡去擔鹽等因

到道看得綦城已破之後自城外至大窩舖一百五十里
居民逃竄人煙已絕又隔白渡河無船可渡故偵探各有
異同今快手陳忠自圍城中出其言似爲可據等因初四
日又據該道呈稱拏獲播苗九受供稱楊應龍聞中國進
勦只得先出所領兵通共三萬零五百其未發餘兵俱應
龍子楊朝棟領守沙溪七麻山等處防奢宣撫與貴州於
本年五月二十五日出打綦江至六月十三日阻水與房
遊擊隔河相殺不利退回至十九日又來二十日與張良
賢撕殺將苗頭鹿罕殺死其餘殺死散苗極多中傷者應
龍皆給銀二兩三兩不等二十一日打城因房遊擊自被

火燒乃得入城見今還要打南川龍泉二處將二處倉糧盡要燒燬使進剿之兵無所資食方纔入司等情同日又據重慶府呈據綦江縣申稱二十一日播酋親統苗兵六萬圍城與房遊擊張良賢對陣亂拋火石城頭火起各兵難立一時滾下城牆苗兵直入當卽殺死房遊擊張良賢蔣百戶生擒胡提調孟百戶其餘各官逃亡不知所之殺死兵民不計其數一時堆屍塞街打入縣堂殺死吏書皂快及避難街民一百餘打入後堂將什物一掃劫去次打入監房將各囚放出各令投順去次打入官庫先將外庫銀罄劫將內庫銀留數百勇兵看守圍裏自夜達旦二十

二日早差出把總李旭何漢良將官庫貯銀檢過二千盡數持去仍恨要庫子及避難街民湯禮等立一領契逼本縣用印將銀二千作賞兵之費次卽打倉眾兵各依倉就食復懸牌內云本司率兵到棊路遠不便運餉暫將棊江縣庫貯銀兩倉貯米穀盡數借支無得阻難取罪二十三

日放火燒城內官民房約有百餘家二十四日與本縣會話要改勦爲撫又要取各奏民及楊可棟屍棺要臺本縣到州作質事平之日方送還縣二十五日早起先放火燒倉次卽燒營鎖押目把十餘人進縣直入後堂拏本縣親子馬兆斗親舅許雲龍一路隨帶退兵三溪等因十九日

又據該道呈抄播州宣慰司申該道公文一紙內稱隍原任宣慰楊應龍闕稱七月初七日蒙差官李光祚齎檄傳諭施天地好生之德優禮腆儀給賞次男還鄉歸葬繼世不忘今發奸奴何邦卿係已死之屍于春一名原是從惡而首犯何汝仁等餘黨不絕必有後患一遭訴得明白免致奸詭復生等情又據該道呈爲急報夷情事據綦江縣申據本縣三溪住民羅可助羅枝羅從友羅守用係生員羅舟羅雍羅于澤羅允羅蜀義男告稱楊酋自破城之後一向劄營三溪母渡等處又於初八日將三溪田地沿邊插旗爲號播界自某處起某處止鐫一石碑豎立界口號

爲宣慰官莊且將各民房拆毀改作倉廩該本縣看得逆
酋肆行無忌濶占民地拆毀民房將使一方之民居食無
賴殘破餘黎何由復業等因到道合行呈報等因又據重
慶府知府張興行稟稱酋將綦之三溪母渡等處南川東
鄉壩等處立石爲播界三溪創建倉廩割綦南之穀盡數
入倉又發牌江津稱江津合江皆播故土差穆古松等領
兵八萬清理邊界攔阻者翦草除根又一牌令江津撥船
二百隻過江往壁山祭祖居民不要躲避一草一木不犯
又一帖行涪州拏李渡鎮潛住讎奴等情各呈稟到臣除
陸續批行外查得該酋申道文內稱發何邦卿已死之屍

及于春一名并取伊男原屍一節向未見該道府申報一面隨行查訪是否真僞一面摘將綦江縣所報播首攻城劫庫殺虜官民并沿邊插號豎碑立界緣由塘報兵部問續據該道呈送原差入播諭首指揮李光祚赴臣衙門詢問前情委果是實該臣看得逆酋之殘我內地也可謂不遺餘力矣驍將礮嚴城墮獸驚鳥徙之民膏原齒刃而莫必其命彼其陳兵三溪而嫚書以相加也豈真愛我而不攻哉越國深入踰嶺渡江頓兵於堅城之下彼固亦有所忌也當是時我誠無兵無將無可爲守顧嚴行文告以折其不逞之心亟集兵防以遏其方張之勢稍稽時日自可

保全事機之會間不容髮奈何其周章失措而甘心爲失策之事也夫屍棺之歸雖經詳允顧求而與之則直挾而與之則辱加幣焉則過矣至欽依人犯縊而與之則又過並生者之家屬而與之則又益過國體一辱不可復全士氣一喪不可復伸當是時在城鎮道府縣文武如林乃視若等閑漫然相付獨何心哉臣今方獎率諸臣共圖戡定卽諸臣亦飭兵治餉緝奸峻防夜以繼日猶苦不足蓋冀爲桑榆之收以蓋其東隅之失者臣亦欲徐觀其定忘於無言顧川東人心不知有法久矣自合江獻袁子升黃平獻羅承恩並此而三不於此時別白言之從此各官遂以

媚賊爲排難解紛以辱國爲達權通變以足上首下爲屈已安民行見巽恆成風豪傑解體戰不力守不堅其不胥而爲夷者幾希臣以爲兵戈擾攘籌應實難固不可逐事苛求致難展布第損威傷重所關非小尤宜一處以杜將來合行題請伏乞敕下吏兵二部酌議覆請將獻囚送匿并綦城失守有罪官員姑行令戴罪管事以責後效待事定之日通計功罪並論一面行巡按御史將前後情節通行查勘分別議處具奏定奪施行庶士氣可振國法可彰使過之效可收夷氛之息有日矣緣係再報逆酋情形並議處失策臣工以重國體以飭兵防事理未敢擅便爲此

具本專差承差徐讓齋捧謹題請旨奉聖旨吏兵二部議
了來說吏部覆奉聖旨是馬效武著革了任巡按御史提
問莫睿等革職聽勘梁銓依擬降一級調用其餘有罪官
員著撫按再查明具奏欽此又該兵部覆奉聖旨是逆酋
敢行稱亂亦因處置失宜今各官尙循襲敝套苟且支吾
蔑棄法紀玩視明旨但只畏賊不知畏法何由討逆正罪
靖亂安民著嚴加申飭惟法是舉不許縱容巧玩再致失
策內行查一事還立限與他不許徇情侵隱

防兵鼓譟疏

題爲郡城偶值兵變旋已平定查叅文武臣工以明法紀以圖安攘事本年八月初四日據巴縣申稱本月初一日辰時有陝兵二百餘名通城沿街搶奪財物復入府縣頭二門亂打當卽打傷生員羅士俊吏書吳起宗劉遐齡等六名平民李守法等三十九名殺傷游成名劉臻任邦成李祥并劫文中軍家財餘街民不知其數財又不足言理合申報等因本月初六日又據兵巡上川東道副使莫睿塘報八月初一日巳時據巡捕官傳言萬總兵差家丁六七十名將府縣門打入眾鄉官往萬總兵處勸其取回各

家丁沿街打搶至本道門首口稱凡係道府人役便要打搶并剝奪衣服本道隨喚房遊擊張良賢舊家丁投在本道門下者諭令傳示各兵有話可來面稟何事行兇取死一面取石砧酉陽兵進城一面差人持帖與萬總兵言何事叫家丁反亂萬總兵隨拏令旗喚回訖除搶奪殺傷查明另報外至本日午時萬總兵來顧本道詢其所以云此事我不知去後又據各鄉官來顧言黎明聞有聲息卽拉眾往柴遊擊處央其轉達萬總兵速差人傳諭柴不肯行強之方去眾鄉官隨至總鎮門首看門人拒不肯通及相見時方傳令則各家丁已打搶散矣先是七月二十九日

據名色把總高達盛晏朝海等報招到建武兵本道發府
查驗多係有名無人用錢一二十文雇巴縣人應名該府
革退二百餘名本道親驗革退一百七十餘名將代應者
責治發刑廳審問事完隨據理刑廳差快手稟稱領兵官
許忠因恐府認出替身持刀將快手毆打本道隨拏許忠
責治發理刑廳審問卽往拜萬總兵彼盛怒稱要許高推
官并與相打本道笑言何至於此查兵莫非公事於官何
與小嫌不必介意遂別不意次早卽有此事本道自疑或
係建武退兵細訪並無建武一人據萬總兵亦稱建武兵
盡割城外係其家丁所爲等因又據重慶府稟稱總鎮把

總官高逢盛等各送召募建武兵冊到道發府點驗募兵二千有零本道委官在城門數實在人數僅一千七十七名次日據冊點驗有老弱不堪者有名無人者與巴人冒籍建武者共一百七十餘名汰去責發出示照實在兵領糧刑廳阜快及街市人認出冒籍二十四人稟刑廳有領兵官許忠欲刀砍認冒籍者刑廳將許忠送道責監初一日忽總鎮家丁一二百人進府大門至刑廳外署打毀牌匾等項又入縣門打傷吏書數人又至道門打毀排柵直入堂上有本道家丁欲射各退至中軍文之粹家將家財盡劫沿街鋪面貨物搶去無數石砧西陽土兵進城各家丁

方纔散訖打刑廳快手將死者二人傷者數人府堂快手傷者二人街市傷者一二十人總鎮家丁初到與道府無嫌所點建武兵不作亂而家丁乃敢狂逞中間以私忿主使可榮見矣等因本月初八日又據鎮守總兵官萬鏊呈云云等因通報到臣該臣看得今日之渝城亦所謂危急存亡之秋也四封之內殺氣干雲百里之外羣盜滿眼方且烏合萬餘土漢之兵聚之一城用以遏敵勢而定民心此其勢亦孔棘矣初臣聞綦江旣破意欲馳入重慶督兵城守而諸臣僉議以爲今賊所以狂逞者以吾且行剿故先發制人也督撫至渝賊以爲剿在目前狂逞必甚乃我

之兵力僅可嬰城以重臣擁麾之地而賊壘在郊計無所
之則虎豹之勢盡矣臣亦以爲然且止不行願臣身雖在
省會而心則未嘗一時不往來於敘瀘重涪之間也然亦
以爲一城之內武則有帥有將文則有道有府使其協和
輯睦以固其交卧薪嘗膽以脩其備則轉弱爲強因敗爲
功桑榆之收且可以補東隅之失奈之何其計不出此而
復有今日之事乎夫招兵方至而鼓譟隨之此其釁蓋自
建武之兵始乃爲亂者非建武兵而陝兵也又總兵之家
丁也則總兵亦何辭之與有夫招兵而有虛冒此營伍之
弊也點兵而有摘發此道府之事也雖從官責監體而少

損然爲法受辱亦所當然乃悻悻然見於其面至欲攘臂以相加則過矣彼家丁者行將颺去心已無聊乘釁而起夫何所忌幸而多兵相制未有殺傷僅至橫屍路隅開門延寇當是時爲鑿者卽百其身其足贖乎夫家丁作亂罪在將官卽有私忿或未肯甘心主使但未事何不早爲消彌聞變何不速爲禁止或其憤鬱不平之極遂有不暇慮其他者乎卽曰正法何足補過臣於是不能爲鑿解也尙有揭其贓私數多及通賊納賄之事臣謂事後投揭或出讎口方在查訪未卽叅論願卽見事論之招兵虛昌胡以應敵家丁不法何況大眾主帥如此尙望其折衝禦侮耶

臣於是益不能爲鑿解矣柴尙仁身爲偏裨左右大將一旦變起倉卒自宜挺身爲解而遲遲其行強而後可意欲何爲均應叅論參照總兵萬鏊碌碌無奇沾沾自喜感憤頓生客氣頹弛不振軍威元戎何在幾成彎弓倒戈之形首惡雖擒已在焦頭爛額之後輿議豈皆讎口亂萌尤可寒心柴尙仁當機泄泄排難遲遲豈曰快睚眦之私徒以重將領之過此二臣者俱應革任同衛者也至於道府官平日不無周章此事原非其罪自應免議况以查兵行法之事而議及之亦不可以爲訓但副使莫睿失事獻囚已屢經叅劾矣知府張興行隱匿殺戮已降級管事矣總之

物望頗輕故召侮爲易且渝城何地此時何時而可以才
望不孚屢經指摘之人久居其間蓋在睿則品稱孤介識
乏融通平時之失策已多此日之損威更甚在張與行則
素彰隱蔽之聲近著敗亡之效難圖末路會須改絃以上
二臣俱應量行改調以責後效者也除前後失事情節及
干礙人員仍俟查明另議外合先題請伏乞敕下吏兵二
部照例議覆施行遺下員缺速選有才望知兵事者推補
庶法紀可伸國威少振內變不作平賊有日矣緣係郡城
偶值兵變旋已平定查叅文武臣工以明法紀以圖安攘
事理未敢擅便爲此具本專差承差鄧一安齎捧謹題請

旨奉聖旨吏兵二部知道兵部覆奉聖旨劉綖著改南京
右軍都督府僉書員缺便會推來用萬鏊柴尙仁革了任
并李光祚等行巡按御史提問與各項贓罪俱查明具奏
李化龍著相機移住調度二省道鎮官兵併力協謀決意
殄賊合用錢糧戶部上緊處發與他其漏洩處播事情逆
黨還著緝事衙門訪拏重處餘俱依擬

請內帑增將兵疏

題爲夷氛甚惡天討宜彰懇乞急發餉銀以佐軍興並議
增調將兵以圖底定事本年八月十二日據兵巡上川東
道副使莫睿報稱據南川縣申本月二十六日偵探應捕
李一登向啓快手汪加忠回報據東鄉村逃回民胡禮稱
說楊應龍差婁國聶把總張提調三人原領各名下苗兵
各三百名假稱清理播界一面偵探內地動靜一面劫虜
人財今縣屬地方如東鄉綠水鄧坎長壩明埡五村俱交
連播界煙斷火絕萬種生靈逃竄已盡難以復業其目把
於本縣地名平潭河鑿一播字殺一人一豬祭碑又於本

縣地名河坎石龍上鑿播州界三字又殺一人一豬一羊
祭碑祭畢鳴鑼大叫各村俱要投播方許安插居住不然
定將房屋燒燬人民盡殺不留有本縣地名溪園槽居民
保甲牌內人戶聶華陳啓宗戴良資等三十餘家畏勢難
敵遂自投順團寨劄營其立意真偽皆不可知至於東鄉
一帶地方熟穀俱被掠收於播地名官壩豎立倉囤共一
十七眼有家小苗數百看守等因本月十三日又據該道
報稱八月初九日據高推官呈解奸細李朝諒係通播重
犯李朝選親弟在楊酋頭目何廷瑞名下何廷瑞令朝諒
前來偵探內地情形因被拏獲本犯稱楊應龍自破碁江

之後卽劄營婁山關外今又移營松坎何廷瑞劄於苗兒岡又有小河臺住民柏益柏化鍾萬變黎文才張懷楊萬便等俱投酋分投入內地打探消息又有三溪住民李思顯造大船一隻在三溪河綦江投酋各民將民房樓板拆去脩造小船百十隻在河兩岸見今陸續脩造未已李思顯已於八月初一日搭船出探事情未知今在何處等因同日又據貴州布政司帶管分守思仁道左布政使應存卓呈據石阡府申報七月初八日據龍泉坪長官司報稱本月初二三四日連據各哨把總報稱播苗破劫石籬門又於馬頭山點兵數日但言伺候楊應龍令箭至日每兵

草鞋一雙飯米三升不知何幹等因看得石阡孤城切近播境萬一逆酋衝突無將無兵何以防禦合行飛報同日又據塘報千百戶胡維城岳鳳鳴各報稱本月初九日有房遊擊舍人緝獲細作李朝諒口稱楊應龍欲回囤因妻田氏出來不知爲何事就住下今見在松坎地方離綦江三日路兵約有三萬楊應龍有叔稱楊相公領兵在苗兒岡沿途脩倉囤積糧儲楊應龍在三溪口造船二百隻又稱在扶歡壩新脩一囤造倉積糧又據操兵王加重稱楊兵在官壩打土厥逐日尋糧上倉等情八月十五日又據塘報千百戶胡維城報稱有綦江被虜兵王雲原係松潘舊

兵從苗兒岡逃出說楊應龍欲回國其妻田氏子朝棟并子婦等俱出來住在關上劄兵三十九營約有十萬之數將虜去軍兵使教土兵放銃製火藥儻教不會將我兵就殺又說要脩一條小路進南川又脩一條小路從黃荆界石場進界石離重慶止四十里若至界石則重慶南川涪州李渡木洞等處路路可通又稱播州關外掘溝設塹又稱三溪口已造船三十餘隻又在取板還要造大船等情同日又據參將王夢吉遊擊楊敏政各報稱八月初一二日節據指揮王繼祖報稱哨探軍兵何江小任二韓通等探得各酋仍在龍門里大魚灣二處初三日又據本官揭

報據軍兵張七雷友探得路上人言楊應龍差夷目二人來上下赤水攢營又袁年將驢子二匹獵犬二隻弩二張差人送往播州不知何幹未知真實初四五六七日節據本官揭報據軍兵李孝得許大全五等探得各酋仍在上赤水大魚灣二處等情本月十六日又據兵巡上川東道呈爲狡酋應叛連兵猖彊等事據石砭宣撫司申稱本月初三日據家丁劉時伸報稱播酋楊應龍知旗令到司取兵於七月初九日遣細作冉廷德於忠鄧伯鯨等家密會叛黨馬邦宸等令彼召兵乘虛攻劫本司馬蓋等遂召亡叛百餘人窩聚於鄧都杜良臣等家於十一日抄劫官莊

冉廷漢將家財牲畜罄般等因同日又據敘馬瀘道呈准
建武遊擊楊敏政手本據守永鎮堡百戶張承宗呈報七
月二十六日據安溪堡地方楊宥龍口稱二十五日有王
繼先差夷目張月伸王枝用陳八兒王友貴馬舟容等帶
兵百餘至地名土洞河東一帶割夷田穀口說要來虜人
况係播夷未知意欲如何等情本日又據塘報余世英稟
稱有安溪壩羅志渡民劉海懷等二十名在於河東耕種
夷田割穀被王繼先夷人張月伸等緝虜去訖本月二十
三日又據敘馬瀘兵備道報稱八月十八日據永甯衛差
去查探旗軍方朝遐報七月十六日楊酋擁兵一次劄至

赤水五畝田滔壩揚言欲借路要往先鵝洞祭祖劄兵數日仍聚賊巢各軍無分星夜周流本屯地界哨探止聞播兵蜂攘未知情形何如本日又據永甯宣撫司報稱查得播兵自六月內入犯綦江之後出沒莫測本撫自合江縣起至河東赤水吼灘土垭茶壩井壩穆艾壩安羅二村白牙固乾竹臺崖孔找崖箐口沙溪停子頭緝麻李博等處抵水西止地方邊境與播州相連見今酋兵已過烏江進貴州二日路是的已該女土官奢世續行令各邊長官頭目照界嚴加防禦合行申報等因本月二十五日又據貴州按察司帶管思石兵巡道按察使易登瀛呈據石阡府

於七月二十六日有龍泉司申稱訪得播苗在於地名馬頭山偏刀水都上壩等處劄營不知動靜又將先年李保阿項造叛地名黃沙坎要路窵爲溝濠等因本日又據石阡司巡捕吏目林中試呈據葛彰司管下地名唐頭沖住人阿膳報稱七月二十三日辰時被播目楊七趙士登等統兵七百有餘在鎮夷關外地名濫泥山燒劫殺死張廷華父子并鄰民七命合寨牛馬財物盡行劫虜緝去男女四十餘人當報地主馮碧陳永朝陳廷玉王應龍等統眾鄉兵千餘趕退口稱不日打關破府及查此關近地名乾溪三里離府止三十里等因本日又據石阡司管下迎仙

里上洞巡捕目把彭大學呈報四牌謝朝俸石辰三於本月二十三日統兵千數劄營崖門揚言集兵過江下掃水口崖底本莊樂橋軍門屯寨上劫思石府衛偏鎮等處各情到司就經遣牌責令各該屯目把集兵防禦外合行呈報等因各具報到臣該臣謹會同巡撫湖廣贊理軍務都察院右僉都御史支可大巡撫貴州兼湖北川東提督軍務都察院右副都御史郭子章巡按四川監察御史趙標巡按湖廣監察御史曹楷巡按貴州監察御史宋興祖議照逆賊楊應龍恃其富彊甘心反逆戮將破城了無忌憚近且占據內地脩倉貯穀因糧於我又復立石鑄碑殺人

以祭蓋已無人心無天道矣昔宋襄用郈子于社子魚曰
六畜不相爲用而况於人乎得死爲幸其後一年而執又
一年而死蓋自古殺人祭神未有不死者此亦逆賊天亡
之時也乃賊復猖然狂逞出沒於川貴之間如鬼如風益
復造船數多將圖水陸並出流毒三省遠近爲之震動人
臣無將將則必誅是尙可少假時日乎臣等僉議會須滅
此朝食乃無後患顧節訪賊之情形實亦非可易與者賊
初用兵時不過二三萬且皆五司七姓五十四里之人自
連年許構撫劔無常賊遂內自驚疑多方設備招集九股
惡苗給以殺戮五司之土地賞以搶掠各省之婦女又擅

立三十六統制三十六巡警十三親管各有頭目各有兵
眾每一人名下多者二三千少者一二千總之不下十四
五萬羽翼已成居然勅敵矣我所以待之豈宜淺鮮談者
謂宜集兵二十萬夫二十萬兵豈易集餉豈易供然非十
四五萬亦未易相當也昔成化時尙書程信勦都蠻用兵
十八萬四年而無成功萬厯初年撫臣曾省吾平九絲用
兵十四萬一年而成功今播州之眾幾倍都蠻海龍之險
不下九絲應龍兇狡知兵又非以前烏合之寇可比是可
草草舉事乎近該臣化龍議調陝浙兵與募川兵共二萬
四千臣子章議招三萬蓋勢窮事急糧餉不充且爲目前

防守之計冀就中取事耳今賊益滋蔓久更難圖必須大
集兵糧亟圖撲滅臣等熟計四川宜用兵六七萬湖貴二
省各宜用兵四五萬總之可十五六萬方保全勝近奉明
旨雲南廣西福建陝西浙江等處兵各得調用卽十五六
萬之數自可取足無容更瀆顧調兵非難處餉爲難兵至
十五六萬卽人日給三分一年須百五十萬三省者非能
辦此也貴州原無毫釐之積臣近查其布政司庫銀稱可
動支者僅僅七千令人心悸四川先年頗有積蓄自連年
採木事起撥括一空今止有當年額糧各有正項止可暫
借難以久假湖廣者尙未查到然大約在川之下貴之上

三省物力不過如此將何以支數萬人之食乎近見太倉空乏計臣無措臣等不敢徑請臣化龍止求留餉秦之需還借滇之數僅三十萬耳然秦中之餉今年者已解滇中之銀恐未能卽還臣子章止求於各省借給總之亦捕風捉影未可保其必得也近見邸報該兵部覆奉聖旨兵餉著戶部悉心議處與他勿待來請不許支吾了事欽此仰見聖心垂念遠徼賊不足平矣第恐戶部計無所出止令各省接括萬一各省復乏求之不應往返請乞便歷時月脫有庚癸之呼其可令賊聞且見乎臣等以爲今日之事在四川宜先發五十萬仍留陝西餉銀及催滇中還銀以

爲接濟在湖廣宜先發三十萬仍俟臣可大查本省各項錢糧有應留用借用者徑自題請在貴州原無積蓄亦無可留借者姑先發三十萬以上應發錢糧半取之太僕寺半取之河南淮安南京福建兩廣等處以爲半年之餉刻期解到庶克有濟至於各處調到軍兵月糧仍在原籍支給川湖貴三處每日止照近日援遼事例給與行糧蓋卽每兵日給三分而前項解發之數僅支多半年盡矣至於以後如事不卽結或再行請乞或量行徵派統候部議遵行此三省糧餉之大略也而將與兵亦有所當覆議者夫今鄰播總兵四川有劉綎貴州有童元鎮各制一方無容

更議矣惟是湖廣清平偏鎮四衛俱邊播境湄潭一路更當逆賊狂鋒之衝連年逆賊招誘生苗多從偏橋往來恣行搶掠莫可誰何近該臣等議將貴州總兵移駐偏橋顧偏橋去賊巢近然去貴州省城遠矣貴州去賊巢不及三百里一渡烏江窮日可至與偏橋相望四五百里中隔平越興隆皆通賊之路今春飛練之役實自平越賊若分犯各路直逼省城此非一總兵之力所能禦也且貴州總兵之於偏橋蓋兼制之地也湖廣兵餉宜得湖廣總兵會同湖廣巡撫調發方得精神相貫應付如期乃貴州撫鎮俱以兼制之衝用之此在居平猶可寇在門戶則兵發大

餉欲求臂指如意桴鼓相隨不亦難乎先年湖廣原有總兵且以侯伯爲之後以承平日久暫議裁革今非無事時矣原無者亦應議增况原有者自應議復臣等以爲武昌去南界遠在二三百里卽聲聞亦難相通何况調度臣可大宜移駐沅州該省仍設一總兵無事駐劄沅州有事移駐偏橋其貴州總兵無事駐劄省城有事移駐平越統待事甯另議庶幾兩地密於張羅而逆酋已坐井中此萬全之算也其湖廣原無兵馬今欲創設四五萬召募旣難如期土兵亦難全恃臣等查得近年備倭沿江一帶皆設南兵如揚州二千鎮江二千新生洲二千淮安三千江北廟

灣二千南京新設六營亦可揀選三千此皆見有糧餉無煩召募者今海氛久息備而不用宜行文各處撫臣量給行糧遣發卽以原將統領赴偏橋一帶聽總兵分布防守不足者方調湖省各土司及武岡麻陽等處民兵殺手務足三萬以上之數其外處調到兵月糧仍於原籍支給湖廣亦照前例止給行糧事甯仍各歸原地防守蓋將止復其原有兵半取之素練甚便計也臣等又查得貴州所屬石阡思南二府婺川一縣去貴省遠可千里而各府縣鄰播巢各一二日程耳各府縣從來無一兵一將止有龍泉一守備領兵千餘控制其衝而兵微將寡又無城可守賊

每欲聚而焚之無龍泉則思石葵川隨其後矣臣等以爲宜於石阡設一參將葵川設一遊擊各領兵三千一以爲本城之防守一以爲龍泉之聲援其兵將不必另設卽以新設湖廣總兵調來之兵將移駐此皆貴州地也然在偏橋之西去湖廣總兵近而去貴州總兵遠防守之事宜全聽湖廣總兵提調貴州總兵亦得遙制庶體統事勢兩得相安至於偏橋四衛向雖屬貴州總兵兼制今既有湖廣總兵自有專屬不必更屬貴州總兵矣抑臣等猶有說焉近見邸報兵部覆本內稱廣西總兵陳璘馬上催促由湖廣取道直趨粵西聽援不許繞路粵東有誤纓冠之義計

陳璘當不日至湖廣矣璘素有威名近征倭更著戰功粵西無事將非所急臣等以爲宜卽改爲湖廣總兵卽令於湖廣候旨到任管事其廣西總兵另行推補將見逆賊聞之以爲將軍從天而下也其有不視魄而奪之氣乎至於雲南總兵應移駐霑益州廣西總兵應移駐泗城州庶乎聲聞相及援擣爲便以上事體統應題請伏乞敕下戶兵二部酌議覆請將前項糧餉急行解發將領急行增設兵馬應調者行各該地方撫臣調發總鎮應移者行各處總兵蚤行移駐新設將領應給敕印等項查例議給應得廩費等項臣等徑自議處庶乎糧足兵精敵愾之勇自倍倚

前角後螻蟻之命難逃逆賊不足平太甯可計日矣緣係
夷氛甚惡天討宜彰懇乞急發餉銀以佐軍興並議增調
將兵以圖底定事理未敢擅便爲此具本專差承差劉佐
齋捧謹題請旨奉聖旨戶兵二部知道兵部覆奉聖旨依
擬行內協助餉銀戶兵二部屢次互相執奏關係軍需恐
致妨誤不小著都察院會同二部虛心定議來說欽此戶
部覆奉聖旨是兵興餉急這四川湖廣地畝加派隄機宜
行著總督於三省通融支用仍禁有司豪右巧避貪漁等
弊毋致累苦窮民兵罷之日卽行具奏減免

更調府佐縣令疏

題爲遵旨更調有司官員以新吏治以濟時艱事准兵部
咨該本部覆奉聖旨司道官凡係用兵處所的吏部就近
更調有才略諳機宜的去府縣官許該撫按於本省內揀
選調用欽此爲照郡縣之吏最爲親民居平以爲怙恃臨
難以爲保障蓋其重也西川越在遐陬人不樂就懸缺者
十常四五又向來因俗爲治法網頗寬溺職者十常二三
天下無事共以舒徐寬大柔懷遠民卽愚智同途未爲深
累乃一旦變起倉卒遠邇震駭臣等驟用軍興法督責有
司有司非倉皇失措則濡滯後時卽欲以法裁之而多不

可勝且其才具各別用非其數雖有嚴刑重罰未易改也
今卽欲除之銓司借之異省日引月長何裨目下惟是於
百城之內酌衝緩析才品互爲調補各用所長庶幾克濟
蓋天語昭然已明見萬里之外矣臣謹會同巡按四川監
察御史趙標將通省地方查算以邊播用兵者爲最衝臨
江運餉者次之臨官道過兵馬者又次之或懸缺未補或
人地不宜皆宜急處又將府州縣各官逐一比量除人地
相宜應照舊供職外有人浮於地及地浮於人者宜更其
地有贖貨淫刑或異愷不任者宜更其官任淺者宜平調
任久者宜遷轉任久而仍其地者宜加銜若是者共得二

三十人謹爲皇上陳之如保甯府同知梅燮馬湖府通判
張問禮合州知州張鼂雅州知州邵崇雅長壽知縣葉聯
芳萬縣知縣周作樂射洪知縣周文郁彭山知縣王大才
夾江知縣郭維屏高縣知縣越應虞蓬溪知縣陳大經建
始知縣倪伯麒大邑知縣黃杞縣竹知縣蕭時鳴太平知
縣潘應相大昌知縣高雲鳳通江知縣劉昇營山知縣向
日丹梓潼知縣傅遇高丹稜知縣樂繼同南溪知縣羅應
雲岳池知縣劉之瀾達州同知高數仞瀘州判官寇克順
岳池主簿何珩眉州學正劉應命大邑縣教諭汪廷玉射
洪縣教諭劉懷宇梁山縣訓導任思永以上二十九員才

猷練達注措精詳在事而上信下孚已著當官之效移治則駕輕就熟必流符寶之聲皆宜陞調衝繁者也重慶府通判鄧學思駐鎮黃平通判王三策夔州府通判林大任墊江知縣龍襄隆昌知縣魏桂以上五員政亦寬平才乏敏練劇任或非其理僻地當盡所長皆應以不及調簡者也廣元縣知縣卿一鳴才訓是下中之品行已在清濁之間問斷略不分明眾號之曰糊塗鬼左右公行撥置人謂之爲滿堂官條鞭取羨所得何止數千詞訟罰銀俸免幾無一二昏庸已甚疾病難堪中江縣知縣張繼茂才本平常性尤迂緩文移信吏書指點有稟卽行詞訟任原被縱

橫無告不准徵收秤頭雖重而所得無幾蓋門吏半匿原封問理罰贖甚多而入已有限蓋胥役不銷原票一籌莫展百弊叢生梁山縣知縣徐博卿以醉爲節以吏爲師上司前件常至一二百起懵然不知差人批限常違三兩月外付之不問攜孫山人掌文移遂至干政任朱門子管堂事未免營私告狀非錢不行採木入賄卽免醉生夢死廢事殃民營縣知縣邱宗周才似疏通而性氣過激志欲振刷而精神不充越訴輒斃於杖頭未完盡束之高閣鄉民不敢入縣畏其淫刑衙役常如負芒或曰動火久之恐成酷吏罷之惜其清操眉州降同知管州事盧豪膏肓成病

狐鼠滿前文移全欠剗裁或至舛錯或至停閣錢糧不能
清楚半係低假半係侵欺溺愛則阜隸毆死人命反罪屍
親健忘則上司問以未完但爾張目荒唐政事土木形骸
以上五員亦應以不及論內張繼茂徐博卿應改教邱宗
周應降閑散卿一鳴應降一級調用盧豪應以原降州同
知別用者也德陽縣知縣史載道初以虛憍買聲後以恣
肆敗檢詞訟濫行科罰致小民含怒於心條鞭多取秤頭
令排年黏帖於市姦雙從竊之妻被盜其申掩陳主簿之
口多賂以金曾是兵火之區當此淫昏之政此一臣者所
當照不謹例聞住者也東川軍民府通判梅廷哲官已落

落才亦平平祇緣二豎相侵因致半身不遂尋醫問藥無能強起殘軀嘆老嗟卑猶自棲遲薄宦何官可以卧治何地不可休官若竟其不自割之心恐致有不可知之事此一臣者所宜照老疾例行令致仕者也綦江縣知縣馬效武才力縣弱政事摸稜賊起不能思患預防城破不能守死善道雖文臣難責以摧鋒之事而令甲原自有失守之條此一臣者所宜革任聽勘候另案歸結者也臣等謹遵照近旨將前項府州縣各官酌其資俸量其才地徑行調補如成都府同知見缺以長壽縣知縣葉聯芳陞補其葉聯芳之缺卽以夾江縣知縣郭維屏調補郭維屏之缺卽

以眉州學正劉應命陞補重慶府同知見缺以保甯府同知梅燮調補梅燮之缺以合州知州張鼐陞補張鼐之缺以射洪縣知縣周文郁陞補成都府威茂管糧通判見缺以大邑縣知縣黃杞陞補重慶府通判鄧學思應調簡其缺以縣竹縣知縣蕭時鳴陞補該府駐鎮黃平通判王三策應調簡其缺以南溪縣知縣羅應雲陞補其羅應雲之缺以瀘州判官寇克順陞補夔州府通判林大任應調簡其缺以達州同知高數仞陞補烏蒙府通判見缺以岳池縣知縣劉之瀾陞補眉州知州盧豪應降調其缺以馬湖府通判張問禮陞補忠州知州報補鄧以誠久不到任應

以建始縣知縣倪伯麒陞補其鄧以誠到改任縣州知州
瀘州知州報補胡篤卿久不到任應以雅州知州邵崇雅
調補其胡篤卿到卽任雅州知州漢州知州見缺以彭山
縣知縣王大才陞補其王大才之缺以岳池縣主簿何珩
陞補綦江縣知縣馬效武革任聽勘以萬縣知縣周作樂
加重慶府同知銜管綦江縣事其周作樂之缺以高縣知
縣越應虞調補江津縣知縣報補葉朝陽久不到任以蓬
溪縣知縣陳大經調補其葉朝陽到卽任蓬溪縣知縣黔
江縣知縣見缺以太平縣知縣潘應相調補昭化縣知縣
見缺以射洪縣教諭劉懷宇陞補榮縣知縣邱宗周應降

閑散以丹稜縣知縣樂繼同調補廣元縣知縣卿一鳴應
降用以營山縣知縣向日丹調補德陽縣知縣史載道應
閒住以梁山縣訓導任思永陞補中江縣知縣張繼茂應
改教以梓潼縣知縣傅遇高調補梁山縣知縣徐博卿應
改教以大邑縣教諭王廷玉陞補墊江縣知縣龍襄與大
昌縣知縣高雲鳳互調隆昌縣知縣魏桂與通江縣知縣
劉昇互調以上各官陞者俱係優陞調者俱係優調但府
州官俸深者暫阻內遷縣官俸深者不得行取不無少望
然地方有事就近借才事甯之後不妨優處內有萬縣知
縣周作樂吏治最優凝地最苦但綦江重地非此人不足

以當之事甯另當優異又烏蒙府不係急缺向來陞此缺亦非優轉緣劉之灞頗優於才不理於口故令轉此官暫於軍前效用事完亦另行優處其各官應處者臣等已會行革任應赴新任者已行令限文到十日內到任俟其報有到任月日卽轉報吏部以新俸算起尙有有缺無補者馬湖府通判東川軍民府通判縣竹太平夾江射洪高縣大邑岳池營山建始丹稜梓潼各縣知縣達州同知瀘州判官岳池縣主簿眉州學正射洪大邑縣教諭梁山縣訓導吏部皆宜查理相應人員速爲銓補嚴行依限到任其原係懸缺今擬調補者該部卽已補有人亦不必改除徑

令赴川到省臣等另查相應員缺擬補報部蓋此地所患
有地無人不患有人無地也尙有原缺未補者如南充縣
富順縣郫縣東鄉縣等處皆宜急補其南充富順俱係大
縣尤須風力甲科乃能彈壓再查各地方官久不到任者
俱係兩廣福建浙江等處去川絕遠卽疾馳之騎亦須二
三月始達各官攜家乘舟逆水何能卽至經年無官弊蓋
坐此今後宜將近川如陝西湖廣雲貴卽河南亦尙易至
以此近便地方人才除補其絕遠如前項地方人員不必
銓除致人地兩下不便尤須多選甲科以資整頓以起頽
弛以上事體統應題請伏乞敕下吏部議覆如果臣等所

言不謬照擬上請行臣等遵奉施行庶內治旣修外攘益
裕區區逆賊不足平矣緣係遵旨更調有司官員以新吏
治以濟時艱事理未敢擅便爲此具本專差承差黃可美
齋捧謹題請旨奉聖旨吏部知道該本部覆奉聖旨俱依
擬